



# PREZIDÊNCIA KONSELLU MINISTRUS

VIII GOVERNUN KONSTITUSIONÁL

## KOMUNIKADU IMPRENSA

### Sorumutuk Konsellu Ministrus nian iha loron 21 fulan-setembru tinan 2018

Konsellu Ministrus hala'o sorumutuk iha Palásiu Governu, iha Dili, no aprova ona **kontinuasaun husi rejime duodésimu durante fulan-setembru** atubele aseguira pagamentu saláriu no despeza sira seluk, tanba Orsamentu Jerál Estadu (OJE) ba tinan 2018, Prezidente Repúblika sei analiza hela hodi hein ninia promulgasaun. Medida ida-ne'e enkuadra iha ezekusaun valór sira ne'ebé maka transfere husi Fundu Mina-Rai nian iha fulan-agostu liubá, tanba ne'e maka la presiza hato'o pedidu ba Parlamentu Nasionál atu hetan autorizasaun.

Konsellu Ministrus analiza ona apresentasaun husi Ministériu Negósius Estranjeirus no Kooperasaun kona-ba **akordu atu troka nota entre Governu Repúblika Demokrátika Timor-Leste no Governu Japaun** nian atu habelar kooperasaun ekonómika iha ámbitu subvensaun husi Ajénsia Kooperasaun Internasionál Japaun nian (JICA, sigla iha lian inglés) ba projetu bolsa estudu ba dezvoltimentu rekursu umanu (Japan Development Scholarships - JDS). JDS ne'e maka programa kooperasaun Japaun nian ida-ne'ebé hahú iha tinan 1999, ne'ebé implementa ona iha nasaun hamutuk 15 ho objetivu atu apoia dezvoltimentu rekursu umanu. Membru Governu sira debate kona-ba polítika implementasaun no programasaun nian no mós área prioritária sira estudu nian husi programa ne'e tuir prioridade nasional sira.

Ministra Finansas iha ezersísiu, Sara Lobo Brites, apresenta ba Konsellu Ministrus atubele halo apresiasaun kona-ba senáriu hirak ne'ebé posivel ba **limite másimu husi orsamentu ba tinan fiskál 2019 nian**. Governu deside ona katak OJE ba tinan 2019 ninia limite másimu orsamentál maka dolar amerikanu millaun rihun 1.35. Membru Governu sira diskute ona mós kona-ba kalendáriu preparasaun nian no prioridade nasional sira ba OJE tinan 2019 nian. Dokumentu ne'e sei submete to'o loron 8 fulan-novembru oin-mai.



Palácio do Governo,  
Avenida Presidente Nicolau Lobato,  
Dili, Timor-Leste

pcm.gov.tl@mail.com  
(+670) 33 310 608

Konsellu Ministrus aprova ona **autorizasaun ba Ministru Defeza, Filomeno da Paixão de Jesus, atu asina akordu entre Governu Repúblika Demokrátika Timor-Leste no Governu Japaun** ba atividade edukasaun no formasaun nian iha área sira hanesan assisténsia téknika umanitária no operasaun assisténsia nian iha kazu katrástrofe sira.

Aprezenta ona mós ba Konsellu Ministrus **relatóriu kona-ba misaun esploratória apoiu nian husi Timor-Leste ba eleisaun iha loron 18 fulan-novembru tinan 2018 oin-mai, iha Repúblika Giné-Bisau**, husi Tomás do Rosário Cabral, Representante Espesiál Governu Repúblika Demokrátika Timor-Leste nian ba Repúblika Giné-Bisau atu fó apoiu ba organizasaun eleisaun nian. Delegasaun Timor nian, ne'ebé lidera husi Representante Espesiál ne'e, vizita ona Giné-Bisau husi loron 3 to'o 15 fulan-setembru hodi hasoru malu ho autoridade lokál sira atu haree kondisaun sira-ne'ebé eziste no identifika nesesidade sira ba organizasaun resenseamentu eleitorál no ba realizasaun eleisaun ne'ebé livre no demokrátika.

Ikusliu, Konsellu Ministrus aprova ona proposta kona-ba Dekretu Governu nian, ne'ebé apresenta husi Ministra Edukasaun, Juventude no Desportu, Dulce de Jesus Soares, kona-ba **suplementu remuneratóriu ba funsionáriu sira no ajente sira husi Ministériu Edukasaun, Juventude no Desportu ne'ebé hala'o serbisu iha prosesu preparasaun no implementasaun prova nasionál no ezame nasionál sira**. Dekretu Governu nian ne'ebé hetan ona aprovasaun ne'e estabelese osan ho valór dolar ida sentavu limanulu ba kada oras estra husi loron-segunda to'o loron-sesta no dolar rua sentavu limanulu ba kada oras iha loron-sábadu no loron-domingu.

**REMATA**



Palácio do Governo,  
Avenida Presidente Nicolau Lobato,  
Dili, Timor-Leste

pcm.gov.tl@mail.com  
(+670) 33 310 608